

Wir Johann von der Reck[?] und Mechtilds Judith geborne von Galen[?] vom Ermelinckhaue[?] El[...] Herr und Fraw Zu Dreienstenfurt thuen kundt allermenglich und bekennen offentlich mit diesem Brieff, daß wir mit vorgehabten annahmen rhaet und genommenen vorbed[...] umb unseren besten nutzen halben wissentlich und wohlbedachtlich mitt keinen gefehrden oder Betrieglichkeiten hintergangen oder eingeführt, sondern freiwillig ungetrungen und Ungezwungen eines steeten(?), vesten, ewigen unwiderrufflichen, Und in allen Geist- und weltlichen gericht: und rechten insonderheit nach dieses Stiffts Münster Loblichen gewöhnlichen kreftigst: und bestendigsten Erbkauffs dem Ehrenhafften unnd Tugentreichen Gerhardten Martells unnd Judith Rauen[?] Eheleutten, allen ihren erben anerben und nachkommen verkaufft unnd Ubergelassen haben verkauffen unnd Uberlaßen, hiermit und kraft dieses Brieffs einen halben garb oder korn beneben den halben Lebendigen oder blutigen Zehnden, wie der in Embßland von gericht unnd kerspels(?) Meppen und Burschafft rhule gelegen wir den selben bishero von den grafflichen Hauß zu Steinfurth Zu lehen geträgen(?) nunmehr aber gegen erstattete verwechßelung Unseres im Kerspel Ahlen(?), in der bauerschaft Borben[?] gelegenen Zehnden von der grafflichen Lehenbauer(?) Zu Bentheimb, Unnß alß allodial Zum erkaufften genedig Zugelaßen und derselb im Embßland im gericht unnd kerspel Meppen burschafft Rhule gelegen, unnd Jahrlichs auß allen unnd Jeden darein situirten geseelen unnd halben Erben kotten, und Brinksitzern benentlich gruters käers hulsters Ottens kappens keuters Tegeders[?], bollemers, bruinmers Potkers Hummelingh kruese hellen, pickers broseken dranten hancken Campeth Likenbroeben[?] Sehorrs[?] unnd lampgerdts unnd Zu dieser Rhulescher Marcken gehörigen Hauen Wohnungen Eschen, Merschen Lenderein kampen wieschen gärten unnd anderen pertinentien empfangen unnd außgenommen wirt, mit allen seinen begriffen Zubehorungen unnd rechten gantz achts(?) außgenommen wie Wir denselben von Unseren in Godt ruhenden Vorfahren ererbet unnd bißhero besessen, genutzt, genossen und eingehabt oder einnehmen laßen, für frey allodial durchschlechtig gütt unverpflichtet, unverwiedmet unvermergen gabet unversetzt unverbunden und Unbeschwert sind, und vor ein sichere unnd gnugsame sumb geldes wie wir in dato dieses brieffs bahr empfangen unnd die furter wiederumb in unserer Unnd Unserer Erben scheinbaren nutzen Unnd frommen anwenden werden, derowegen Wir verkauffen Vor Uns, Unsere Erben unnd anerben Sie obgemelte kauffere Unnd ihre Erben hiemit ledig unnd wießsagen damit so sollen unnd mogen obgemelte Eheleutten Martells unnd alle Ihre Erben und nachkommen, obgemelten halben Zehnden, mit allen seinen rechten in Und Zugehorungen hiefuro ewig erblich und ruhig einhaben besitzen brauchen unnd nutzen, nießen, einnehmen, damit handeln thuen unnd laßen nach ihren willen und gefallen unverhindert Unser, Unserer Erben unnd anerben und sonsten menigliches dan Wir vor Unnß unnd glte. unserer Erben des alles sambt und sonders verZiehen, entsetzt entwehrt unnd entladen unnd dagegen benante Eheleutte Martells die keuffere alle Ire Erben nachkommen denselben Zehnden in recht, redlich leiblich unnd nutzlichen gewalt unnd gewehre gesetzt gestelt unnd gelaßen haben daran sambt noch sonders ewiglich und nummermehr einige forderung ansprache unnd gerechtigkeit Zu haben, DarZu haben wir mehrberuerte Verkauffer bey Unseren adlichen ehren Und wahren tr[...] vor unñß unnd alle unsere Erben auch vor alle unsere nachkommen unnd menniglichen so sich unser annehmen mogten unnd wollen gelöbet unnd vorsprochen geloben unnd versprechen hiemit diesen Erbkauff unnd alles daß in diesen Brieff vor unnd nach geschrieben, ewig unnd alleweg wahr, veststeet unnd Unwiderrufflich Zu halten unnd dawieder nicht des allgeringste welches diesen, erbkauff Zu wieder gegen durch Unnß oder die unsherige Zu Sprechen oder Zu handeln, sondern mehrgte keuffer ihre Erben unnd nachkommen dieses Erbkauffs unnd Vorkauffs in allen obbeschriebenen worten sonderlich daß solcher halber Rhulescher Zehnde frey ledig Unbekümmert unnd Unbeschwert auch nunmehr auffrichtig allodirt durchschlechtig gutt sey gegen menniglichen ZuVersichern Zu Vorthetigen Unnd Zu vertreten und versprechen,

Vor allen leuten richteren unnd gericht, geist und weltlichen und sonst allenmenglichen, who unnd wie oft das noet ist und wir des von ernenten keufferen oder ihren erben erfurdert werden, wieder allermenglich sich hieran irrent unnd gemein und sonderlich alles das Zuthun, daß zu einer erbaren unnd redlichen auffrichtigen währschafft unnd verthetigung gehört unnd gebuert den wir Unns Vor Unnß Unser Erben unnd alle unser Nachkommen an obgten verkauffer Zehnden aller recht und gerechtigkeit weiter anforderung unnd anspreche auch der exception daß wir umb obgt. Kauffgelt nit mit bauerschafts beZahl oder uber den halben theil eines rechten wirths betrogen oder sonst betrieglich eingeführt wehren, und seind die sache nit vor[...] unnd sonderlich den re[...] welche die gemeinen verZig[...] eß gehe dan ein sonderung mit ernennung der theil Vor, unnd sonst aller anderer behulff gnaden privilegien freiheiten indulten concessione, Verstandt cautelen(?) oder anderer außflüchten, ob solches gleich von concilien [...] romischen kaysern unnd konigen oder anderer gaist- oder weltlichen obrigkeiten durch Unnß unsere Erben oder Jemands anders von unserentwegen erlangt oder auß einiger bewegnus rechten wisse oder volnkommen macht gegeben weren oder wurden, auch alles anders so hiewieder gebraucht oder vorgenommen werden mogt, gantz unnd endtlich auch unwiederruefflich vor Ziehen unnd beerben unns deren aller, Damit aber obbenente keuffere eheleute Martells ihre erben unnd nachkommen dessen alles so hierein begriffen desto sicherer unnd wollhabender sein unnd plaiben mögen, So haben wir Ihnen das vor unns unserer Erben unnd nachkommen Zu rechten, guten und sicheren underpfandt gesetzt unnd setzten hiermit alle unnd Jede unsere ietzig unnd künfftige beweg- und unbewegliche erbe haab unnd guett [...] und who die auch gelegen unnd anZutreffen sein mogten [...] sich daran bestergestalt ohne furgehende rechtsforderung gleichsamb hierüber in contradictorio iudicio Urthel und recht erhalten were per uiam parate executionis haben zu erhalten und schadloß zu machen dha vielleicht welches doch mit Gott nit sein soll dieser kauff und verkauff Uber kurtz oder lang, durch Unnß und unsere Erben nit ghalten oder die einigerlej weise dawieder gehandelt werden sollte, dagegen wir oder unsere erben noch iemant von

unsererentwegen nit sollen oder wolle, gebrauchen oder vornemmen einige einrede oder exceptiones wie die in verhoren beschriebenen oder sonsten erdacht unnd Unnß zu hülf und Zu steur unnd den keufferen ihren erben unnd Nachkommen Zum Nachtheill geräthen mogten wollen Unnß auch deren vor Unnß unnd Unseren Erben hiemit unnd krafft dieses brieffs in der aller bester forms(?), der rechten begeben habe, und darauff r[...] und VerZigen, Alles ohne gefehrde, Zur wahrheit Urkunde dessen hab Ich Johan von der Reck[?] Herr Zu Dreiensteinfurt hieunden mein handschriftt gesetzte unnd angebornes Ingesiegel daran gehangen Unnd respective untertruckt, und ist dieß alles geschehen alß man Zehlet nach Cristi Unsers lieben Hern geburt Tausent sechßhundert funffzighZwey an sechtZehnden monats Aprilis unnd Ich Mechtels Judith von Galen[?] des obgt. Hern Verkeuffers eheliche haußfraw bekenne vor mich und alle mein Erben, daß dieser kauff unnd verkauff sambt allen obbeschriebenen puncten unnd articulen mit meinem gueten Vorwissen unnd willen beschehen, unnd sonderlich das gter Zehende mit allen seinen in und Zugehorungen mir weder vorwiedenet(?) vermorgen gebet(?) nach anderer weise verschrieben, versetzt noch verpflichtet ist deßhalb Ich den Vor mich unnd alle meine erben allen ansprach und furderung und gerechtigkeit gantzlichen vorZige habe, sambt allen freiheiten, gnaden rechten unnd gerechten, auch aller außflüchten, funden, listen, Unteren sachen unnd gefährde und sonderlichen der kayserlichen freiheit Senatus consulti Velleriani friedlichen gepflecht Zu wiederbringung ihrer gerechtikeit gegeben und mir hierin, eigentlich vorteutschet. Zu wahren vesten urkunde habe Ich dieß mit aigen hande unterschrieben.